

Thursday, September 4, 2025

Time - 2:30pm

## GST REFORMS

Prime Minister Narendra Modi an Independence Day lawmnaa GST kalphung thar tur a sawi chu ramchhunga mipuiten tam takin an chhawr tangkai dawn a, hei hi mipui dawm kanna tur niin mi tam tak a chhawk zangkhai dawn bakah sum dinhmun tha zawnga a her rem beisei a ni.

Akashvani Aizawl chuan hemi chungchangah hian mithiam kawmin Political & Financial Commentator Pu Lalhunliana Ralte chuan GST khawn dan phung tih danglam chu thil tha tak ani a ti a, hei hian thil lei tura pawisa hmanna pawh a ti pung tura ngaih ani tih sawiin chhiah lut pawh a tlem phah tura ngaih a nilo tih a sawi a ni.

Pu Lalhunliana Ralte sawi danin India ramah chhiah khawn dan 4 ni thin chu pahnih lian deuhah khaikhawm ani a ti a, pakhat a sang ber zaa 40% chu mipui nawlpui nghawng lo tura ngaih anih avangin mi tam takin an ngaihven lutuk lo a ti a, zaa 18 mipuiin an chawina GST chu an ngaihven ber niin tunah chuan zaa 5% ah a tla thla tawh dawn a ti a, zaa 28% an chawi thin na ah zaa 18% ani tawh dawn tih sawiin hei hi India mipui zawng zawngin hman theih hun an nghakhlel hle a ti a, ramchhunga thil man hrang hrang pawh a tlahniam tura beisei ani ati bawk.



## ZORO PRESS CONFERENCE

Zo Re-Unification Organisation (ZORO) hruaitute chuan Mizoram State Legislative Assembly-in Mizorama hman tura Forest Conservation (Amendment) Act 2023 a pawm (adopt) chu Zofate pawl sawina lian tak leh harsatna nasa tak thlen thei a nih thu an sawi a; Special Assembly koa ngaihtuah tha leh tura sorkar ngenin, sorkarin a ngaihtuah tha lo a nih chuan a tawp thlenga hmalak an tum thu an sawi.

ZORO hruaitute hian vawiin khan Aizawl Press Club-a thuthar thehdarhtute an kawmnaah ZORO Vice President Pu L. Ramdinliana Renthlei chuan, FCAA hi Supreme Court pawhin a ngaihtuah lai mek a ni a, Court pawhin thuthlukna a la siam theih loh lai leh line of control pawh an la sawifiah theih loh laia Mizoram sorkarin a lo pawm ngawt hi a fel lo hle a, thangthar lo awm zel turte hmakhua a tichhe thei dawn a, he thil hi Zofate pawl sawina lian tak a ni, a ti.

Pu L. Ramdinliana Renthlei chuan Mizoram leh hnam tan a him lo nia an hriat avangin Forest Conservation (Amendment) Act, 2023 chu an pawm theilo a ti a, Mizoram Sorkar chuan Central beng a thlen hma ngeia ngaihtuah tha leh se an duh thu leh, a tul anga Special Assembly pawh koa ennawn leh turin Mizoram Sorkar an ngen a, Mizoram Sorkarin a ngaihtuah tha lo a nih chuan ZORO chuan a tawp thlengin hma a la zel dawn tih a sawi bawk.



## MPCC

Mizoram Pradesh Congress Committee (MPCC) chuan vawiin khan BJP sorkar hnuaia electoral roll tihchingpen tam lutuk an duh loh zia lantirin, Transport Directorate kawtah an pungkhawm a; Transport Directorate atang hian Congress Bhavan thleng electoral roll tihchingpen duh lohna lantirin kawng an zawh nghal a ni.

Thusawitu MPCC PAC member Pu John Siamkunga chuan BJP sorkar hnuaiah vote in rûksakna (Vote Chori) a hluar thu a sawi a, BJP leh election commission ten democracy an pawngsual tia Pu Rahul Gandhia'n a sawi kha thu dik a nih thu a sawi.

Pu John Siamkunga chuan, BJP leh Election Commission hmalak dan dik lo chu hai lan zel a nih thu leh India ramin Rahul Gandhi hmalakna a pawm thu a sawi a; parliament inthlanpui lo awm leh hunah Congress kaihhruai central sorkar a din ngei dawn thu a sawi bawk.



UNION MINISTER ON GST

Sawrkar laipuia Union Minister ten GST tihhniam ani chu lawmawm an tih thu sawiin mi hnuaihning leh harsa zawk tan lawmna thlentu ani dawn tih an sawi.

Union Home Minister Amit Shah chuan GST tih hniam chuan hmeichhiate leh thalaite a bik in mahni kut kawih a eizawng leh sumdawngte tan pawh kawng a awlsam phah dawn ati a, Union Health Minister JP Nadda pawhin GST siamthatna chuan hriselna kawnga sum senso a tihhniam dawn thu a sawi a, he thutlukna hian mi zawng zawng tan healthcare man tlawm zawka kalpui a nih dawn thu a sawi a ni.

Union Minister for Information and Broadcasting Ashwini Vaishnaw chuan sawrkar in GST (Goods and Services Tax) a ti hniam chu lawmawm a tih thu a sawi a. mi hnuaihning leh harsa zawk te tan a thil a awlsam dawn tawh thu sawiin mi zawng zawng tan a thu lawmawm a ni a ti a, Prime Minister Narendra Modia’n ram mipui te tana a hnathawh chu lawmawm a tih thu sawiin GST tih hniam hian zirna kawng ah te, thil lei tur te tan te, eitur leh inchhung bungrua mamawh leh motor lei tur te tan pawh kawng a awlsam tawh dawn thu a sawi a ni.

